

NU BRUTTE SCHÉRZE

‘Ncòpp’a ‘šta tèrra ce so’ sèmpe štate le tipe pacciariélle e ménu male ca ce štèane pecchè l’óme a chille tiémpe tenèa na fréca ‘é pròblème e u cchiù gruosse éva quille d’u magnà, ca nen ce ne stèa.

Pérò ciérte vóte ‘šte tipe pacciariélle superàvene ógné limete: ‘ntenèane cunte manche de la réliggióna.

Une ‘é ‘sse tipe cumbenatte nu bèlle schérze a Menellicche.

‘Štu piézze ‘é mappine sapènne ca u signo’ Réttore quanne facèa la prèrecà, spisse vattèa u puine ‘ncopp’a la taulétta andò z’appogge u libre sacre, ‘ncopp’a u pulpete, le vè la penzata de ‘nchiuvarce le puntenèlle: chille chiuove peccerille e fine fine, senza capocchia.

Éva la fèšta de Sante Mechéle e là, a Sant’Antuone, è fèšta grossa.

Mò Menellicche ‘ncumenzatte a fa la prèrecà e ze ‘nfervurète, quanne a nu ciérte punte dicète: *Sante Mechéle éva...* e che la forza rètte na poinata ‘ncopp’a la taula e subbete menatte n’allucche...*figlie de puttana!*

La gènte, là pe là, rumanète sbalurdita, penzanne ca fusse sciute pazze u signò Réttore. Ma po’, verènne ca u puuriélle ze muccecave la mana p’u dolore, capète e z’iv’ addummannanne cumme avèa fatte a farze male.

Accusì u signò Réttore chiarète u fatte e ricète ca la ‘mbrecazióne nn’éva pe Sante Mechéle (laudatissime), ma p’u sbreugnate fetènte che avèa ‘nchiuvate le chiuove ‘ncopp’a la taula.